

**Talamdan sa
Mga Mensahe alang sa Full-time Training
sa Spring Term sa 2025**

**LINANGKOB NGA HISGOTANAN:
ANG MAHINUNG DANONG MGA PUNTO SA KAMATUORAN SA MGA SULAT NI PABLO—
EFESO**

Mensahe 14

Ang Dakong Misteryo ni Cristo ug sa Iglesia

Basahong Kasulatan: Gen. 2:18-25; Efe. 5:25-32; Juan 19:34

I. Diosnong sugilanon sa gugma ang tibuok Biblia, rekord sa pagpangulitawo sa Dios sa Iyang piniling katawhan ug sa kapulihay pagpakigminyo kanila; gipakita sa tibuok pinadayag sa Biblia kanato ang sugilanon sa gugma sa unibersohanong magtiayon—Gen. 2:21-24; A. A. 1:2-4; Isa. 54:5; 62:5; Jer. 2:2; 3:1, 14; 31:32; Ezeq. 16:8; 23:5; Oseas 2:7, 19; Mat. 9:15; Juan 3:29; 2 Cor. 11:2; Efe. 5:25-32; Bug. 19:7; 21:2, 9-10; 22:17:

- A. Sa makighigugmaay ta nga katawhan sa Dios Kaniya, madawat nato ang Iyang kinabuhi, maingon nga nadawat ni Eva ang kinabuhi ni Adam (Gen. 2:21-22); kining kinabuhia ang magpausa nato sa Dios ug mag-usa Niya kanato.
- B. Aron mausa ang Dios ug ang Iyang katawhan, maghigugmaay gyod sila—Juan 14:21, 23; Exo. 20:6.
- C. Ang paghigugmaay sa Dios ug sa Iyang katawhan nga gipadayag sa Biblia labi gyong sama sa mabinationong paghigugmaay sa lalaki ug babaye—Jer. 2:2; 31:3.
- D. Sa mahigugma ang katawhan sa Dios Kaniya ug mogugol og panahon nga makig-ambitay Niya diha sa Iyang pulong, tuhopan sila sa Dios sa Iyang diosnong elemento, nga magpausa nila Kaniya isip kapikas Niya, nga sama Niya sa kinabuhi, kinaiya, ug pagpadayag—Sal. 119:140, 15-16.
- E. Sa pagkahamtong sa kinabuhi ni Cristo, nahimong kopya ni Cristo ang maghihigugma Niya, nga sama Niya sa kinabuhi, kinaiya, pagpadayag, ug kagamitan (apan dili sa ranggo sa pagka-Dios) nga mahiangay Niya aron magminyo sila—A. A. 6:13; 2 Cor. 3:18; Rom. 8:29; Heb. 6:1a.
- F. “Dako kining misteryoha, apan namulong ko kalabot ni Cristo ug sa iglesia”—Efe. 5:32.

II. Makita nato sa Genesis 2 ang hulagway ni Cristo ug sa iglesia sa mga hulagway nila ni Adam ug Eva:

- A. Naghulagway si Adam sa Dios diha ni Cristo nga maoy tinuod, unibersohanong Bana, nga nangitag maasawa Niya—Rom. 5:14; itandi sa Juan 3:29; 2 Cor. 11:2; Efe. 5:31-32; Bug. 21:9.
- B. “Niingon si Jehova nga Dios, Dili maayo nga mag-inusara ang tawo; buhatan Ko siyag katabang ingon nga kapikas niya”—Gen. 2:18:
 - 1. Naghulagway ug nagpakita ang pagpanginahanglan ni Adam og asawa sa pagpanginahanglan sa Dios, sa pamatigayon Niya, og asawa nga kapikas Niya, ighingpit Niya (sa linetra, kaabay niya).
 - 2. Bisan bug-os ug walay kataposang hingpit ang Dios—si Cristo—dili Siya kompleto kon wala ang iglesia nga Iyang asawa.
 - 3. Tinguha sa Dios nga mabatonan Niya si Adam, nga naghulagway ni Cristo, ug si Eva, nga naghulagway sa iglesia; tuyo Niya nga “pabut-on sila” (1:26); pagpakabaton kinig madaogong Cristo ug madaogong iglesia, si Cristo nga nidaog sa buhat sa yawa ug ang iglesia nga nipukan sa buhat sa yawa; gusto sa Dios nga magbuot si Cristo ug ang iglesia (Rom. 5:17; 16:20; Efe. 1:22-23).

III. Kinahanglang makita nato ang gibuhat sa Dios aron makapalugwag kapikas alang Niya:

- A. Gikan sa yuta giporma sa Dios ang tanang mananap sa kapatagan ug tanang langgam sa langit ug gidala Niya kini ni Adam, “ug ginganlan sa tawo ang tanang hayop ug ang mga langgam sa langit ug ang tanang mananap sa kapatagan, apan walay nakit-an nga katabang alang ni Adam ingon nga kapikas niya”—Gen. 2:19-20.
- B. Sama gyod ang asawa sa bana sa kinabuhi, kinaiya, ug pagpadayag; diha sa kahayopan, mga langgam, ug mga mananap wala makakita si Adam og ikahingpit niya, kanang ikaparis niya.
- C. Aron makapalugwag kapikas Niya, nahimo unang tawo ang Dios, nga gihulagwayan sa paglalang sa Dios kang Adam—Juan 1:14; Rom. 5:14.
- D. “Gipahinanok ni Jehova nga Dios ang tawo, ug natulog siya; ug gikuha Niya ang usa sa iyang mga gusok ug gitakpan Niya ang unod sa dapit niini”—Gen. 2:21:
 - 1. Ang pagkahinanok ni Adam aron mapalugwa si Eva nga asawa niya naghulagway sa pagkamatay ni Cristo sa krus aron mapalugwa ang iglesia nga kapikas Niya (Efe. 5:25-27); sa Biblia nagpasabot og kamatayon ang pagkatulog (1 Cor. 15:18; 1 Tes. 4:13-16; Juan 11:11-14).
 - 2. Ang kamatayon ni Cristo mao ang nagpagula-sa-kinabuhi, nagpaambit-sa-kinabuhi, nagpasanay-sa-kinabuhi, nagpadaghan-sa-kinabuhi, naghulad-nga-kinabuhi nga kamatayon, nga gitiman-an sa lugas sa trigo nga nahulog sa yuta aron mamatay ug motubo aron magpalugwag daghang trigo (12:24) nga himoong tinapay nga mao ang Lawas, ang iglesia (1 Cor. 10:17).
 - 3. Tungod sa pagkamatay ni Cristo nakagula ang kalayo sa diosnong kinabuhi sa sulod Niya, ug tungod sa pagkabanhaw Niya gikapaambit ang nakagula nga diosnong kinabuhi Niya nganha sa Iyang mga magtutuo aron maumol ang iglesia—Luc. 12:49-50.
 - 4. Pinaagi nianang kahikayana giumol ang Dios diha ni Cristo nganha sa tawo lakip na ang Iyang kinabuhi ug kinaiya aron masama sa Dios ang tawo sa kinabuhi ug kinaiya para mahiangay Niya isip kapikas Niya.
- E. “Ang gusok nga gikuha ni Jehova nga Dios gikan sa tawo gitukod Niya nga babaye ug gidala siya ngadto sa lalaki”—Gen. 2:22:
 - 1. Ang gusok nga gikuha gikan sa naabling kilid ni Adam naghulagway sa dili mabali, dili madaot nga kinabuhing dayon ni Cristo (Heb. 7:16; Juan 19:32-33, 36; Exo. 12:46; Sal. 34:20), nga niagay sa gidughang nga kilid Niya (Juan 19:34) aron magpaambit og kinabuhi sa mga magtutuo Niya para mapalugwa ug matukod ang iglesia nga ighingpit Niya:
 - a. Gikan sa kilid ni Cristo nigula ang dugo ug tubig (v. 34), apan ang nigula sa kilid ni Adam gusok ra nga walay dugo; tungod kini kay sa panahon ni Adam wala man kinahanglana ang pagtubos pinaagi sa dugo, kay wala pa may sala.
 - b. Apan sa panahon nga “natulog” si Cristo sa krus, naa na ang problema sa sala; busa, alang sa balaodnong katubsanan nato ang dugo nga nigula sa kilid ni Cristo.
 - c. Sunod sa dugo, nigula ang tubig, nga mao ang nag-agay nga kinabuhi sa Dios alang sa organicong kaluwasan nato (Exo. 17:6; 1 Cor. 10:4; Num. 20:8); kining diosnon, nag-agay, dili linalang nga kinabuhi gihulagwayan sa gusok nga gikuha sa kilid ni Adam (Rom. 5:10).
 - 2. Wala moingon ang Genesis 2:22 nga gilalang si Eva kondili gitukod siya; ang pagtukod ni Eva ginamit ang gusok nga gikuha sa kilid ni Adam naghulagway sa pagtukod sa iglesia pinaagi sa kinabuhi sa pagkabanhaw nga nigula gikan ni Cristo sa pagkamatay Niya didto sa krus ug gipaambit ngadto sa Iyang mga magtutuo sa pagkabanhaw Niya—Juan 12:24; 1 Ped. 1:3.
 - 3. Ang iglesia isip tinuod nga Eva maoy kinatibuk-an ni Cristo diha sa tanang magtutuo Niya; ang iglesia mao ang hulad ni Cristo; gawas sa elemento ni Cristo, wala gyod untay laing elemento diha sa iglesia—Gen. 5:2.

4. Ang naggikan ra ni Cristo nga dunay kinabuhi sa pagkabanhaw Niya ang mahimong ighingpit ug kapikas Niya, ang Lawas ni Cristo—1 Cor. 12:12; Efe. 5:28-30:
 - a. Hukason gyod nato ang tanang natural nga kinabuhi hangtod mapadayag ang buhing Cristo gikan sa atong espiritu; mahimo dayon tang iglesia sa realidad—Col. 3:10-11; Rom. 13:14a.
 - b. Ang pagkinabuhi sa bisan unsang dili Cristo dili man iglesia; "dili na ako ang nabuhi, kondili si Cristo ang nabuhi sa sulod nako" (Gal. 2:20), "alang nako, ang pagkabuhi mao si Cristo" (Fil. 1:21)—kini ang iglesia!
 - c. Ang naggikan ra ni Cristo ang ilhon Niya; ang naggikan ra Niya ang mahiuli Niya ug makaparis Niya.
 5. Naay syudad sa kataposan sa Biblia, ang Bag-ong Jerusalem, ang kinahingpitan ug walay kataposang babaye, ang hiniyang pangasaw-onon, ang asawa sa Cordero (Bug. 21:9; 22:17), nga tinukod sa tulo ka bililhong materyal (21:18-21), nga nagtuman sa eternidad sa hulagwayng gipakita sa Genesis 2; busa, sa hulagway ang tanang bililhong materyal nga gihisgotan sa 2:11-12 alang man sa pagtukod sa babaye.
 6. Maingon nga gikuha si Eva gikan ni Adam ug gidalag balik ngadto ni Adam aron ma-usa ka unod kaniya (v. 24), mobalik sab ni Cristo ang iglesiang gipalugwa gikan ni Cristo (Efe. 5:27; Bug. 19:7) aron ma-usa ka espiritu Kaniya (1 Cor. 6:17); si Cristo ug ang iglesia nga usa ka espiritu, nga gihulagwayan sa bana ug asawa nga usa ka unod, mao ang dakong misteryo (Efe. 5:28-32).
- F. "Niingon ang tawo, Karon kini ang bukog sa akong mga bukog / Ug unod sa akong unod; / Nganlan kini siyag Babaye / Kay gikuha kini siya gikan sa Lalaki. Busa mobiya ang lalaki sa iyang amahan ug sa iyang inahan ug moipon sa iyang asawa, ug mahimo silang usa ka unod"—Gen. 2:23-24:
1. Lubos gyong lugwa ni Cristo ang iglesia; "Cristohon," "mabanhawon," ug langitnon ang iglesia (1 Cor. 12:12; Efe. 2:6); ang mga gipanganak ra pag-usab ni Cristo ug nagkinabuhi pinaagi Niya isip iglesia ang makaparis ug makahingpit Niya.
 2. Inigkakita ni Cristo niini, moingon gyod Siya nga, "Karon kini ang bukog sa Akong mga bukog ug unod sa Akong unod" (itandi sa Gen. 2:23; Efe. 5:30); maingon nga pagtubo ni Adam si Eva, ang iglesia nga pangasaw-onon pagtubo sab ni Cristo nga Pamanhonon (Juan 3:29-30).
 3. Ang pagkahimo nila ni Adam ug ni Eva nga usa ka unod, usa ka kompletong yunit, hulagway man sa pagkausa sa Dios ug tawo isip usa ka espiritu (1 Cor. 6:17); ang moabot nga Bag-ong Jerusalem mao ang walay kataposang pagkausa sa Dios ug tawo, usa ka unibersohanong magtiayon nga kompletong yunit nga hinimo sa Dios ug tawo.
- G. Kay usa man si Adam ug Eva, nagkinabuhi sila sa kaminyoon isip bana ug asawa (Gen. 2:24-25); nagpakita kini nga sa Bag-ong Jerusalem ang nahikay ug nahingpit nga nagtubos nga Tulo-usang Dios isip unibersohanong Bana magkinabuhi sa kaminyoon uban sa tinubos, gipanganak pag-usab, natransporma, ug nahimayang katawhan isip asawa, hangtod sa hangtod (Bug. 22:17a):
1. Ang Ginoong magbubuot, nga naglalang sa uniberso ug sa tanang butang, ang Tulo-usang Dios—ang Amahan, ang Anak, ug ang Espiritu—nga niagi sa mga kahikayan sa pagpakatawo, pagkinabuhi isip tawo, pagkalansang sa krus, pagkabanhaw, ug pagkayab, ug sa kataposan nahimong Espiritung taghatag-og-kinabuhi, naminyo sa linalang, tinubos, gipanganak pag-usab, natransporma, ug nahimayang tawo nga may tulo ka bahin—nga hinimo sa espiritu, kalag, ug lawas—nga sa kaulahian naumol nga iglesia, nga pagpadayag sa Dios.
 2. Sa eternidad nga walay kataposan, magkinabuhi sila nga panagsagol sa Dios ug sa tawo isip usa ka espiritu, sa kinabuhing maayo kaayo ug nag-awas sa kabulahanan ug kalipay, pinaagi sa diosnon, walay kataposan, ug labaw-sa-tanan nga mahimayaong kinabuhi.